

Wada mhuqil tnbrqan na katu ka dapa dmai mbhuway

Knxalan Tanah Tunux cbiyaw, niqan kingal Sediq Toda, hangan na u Iyung Wasaw sunca, tnpusu balay alang na cbiyaw u alang Truku Busi sun haya, maxal sngari kngkawas na ciida, miyah tnbarux Ruku daya ka rudan na, kiya miyah teumal waya Toda ka tnsapah na. Mdrumuc bay qmpah mi hbaraw bay ka laqi na, wada mnduwa bay mblayaq qmlahang mi prana ltlutuc na mniq hiya. Kngkawas maxal mngari spatul dha idas rima diyax mpitu ciida, wada ddulan Tanah Tunux musa teumal Tukingal qmpringan heytag kawsaiyung Sediq Tnpusu Taywan ka hiya, musa mccbu heytag Amirika alang Hweyripin ka hiya, babaw na wada mbiyax mi wada mangal paru bay hangan na, kiya qrasun mi spruun bay qmita Tanah Tunux ka hiya, biqan na qpahun sapah btasan ka hiya, musa dmayaw tmabu dapa mi musa hmaduc patas alang Paran. Niqan Kingal diyax, snkulan keysacu sapah btasan Tanah Tunux Toda ka hiya, paapa dapa dmai mbhuway musa hmaduc patas alang Paran, duling mi mtqiri ka elu daan dha , duma muda elu ddoras mi kkatu uri, naqah hari daan ka elu kndadax alang Toda dhuq alang Paran, asi ka thuway mi qlahang hari ka muda elu, babaw mnusa hmaduc mi mbrinah miyah alang Toda ciida ka hiya, muda msangay tatak qeyting daya alang Tngbarah ka hiya, alaw ddoras mi kkatu bay ka dwiyaq hiya, asi qtai yayung ka ruma hunac na. Bkiyun na qhuni siyaw tatak hiya ka dapa dmai mbhuway na han, ini qbsiyaq daw qmita ddadal na wa mniq Sipaw Twanan alang Toda, kiya pskuraw mdiras mkuwak bawa na lmawa dhyaan ka hiya, lmawa sa “ Ow!...Ow!...nii ku uxay biyaw dhuq da,

Ow!...Ow!... ” enca ka hiya , mnbahang diras hngak na ka dapa dmai mbhuway kiya ciida, wada psklwiyun bay mi wada psbaraw msbotaw, ini qbsiyaq kiya wada tlhlah qhuni ka wasil bnkiyan dapa dmai mbhuway, kiya wada asi sbotaw tburuq yayung hunac ka hiya da.

Dhuq sapah btasan alang Toda hiya ka Iyung Wasaw da u, saan na smnru keysacu Tanah Tunux ka ndaan na, alaw mwalu hiya ka Keysacu Tanah Tunux, iyux na ini pksaang hyaan ka bukung dha, kiya rngawan na sa, “ Iya rngaw sa wada su psklwiyun diras hngak su ka dapa dmai mbhuway, wada nanaq msbotaw mi srahuq tburuq yayung hunac kchaya. ”

Wada lmawa mi psseli Sediq alang ka keysacu Tanah Tunux, snkulan na musa snuul Iyung Wasaw musa miying dapa dmai mbhuway yayung hunac, mnuda ddoras siyaw yayung mi mkraaw qsiya yayung, musa miying tnbrqan dapa dmai mbhuway lmiyu yayung hunac, sndalan dha da u wada tna ttsbuc paru btunux mi wada mhuqil hiya ka dapa dmai mbhuway da. Kiya wada dha bnkiyan qhuni mi kdawan dha mapa musa alang da, dhuq alang ciida da u, wada dha byakun ka dapa dmai mbhuway kiya, rhuwan dha pnttikuh wawa ka Sediq alang, bilaq na mi tunux na da u wada dha spuwan mkan kiya da, mnqaras balay msupu mimah sinaw mi rmri diyax ciida ka dhiya da.

（文章大意 僅供參考） ※字數限 200 字

白馬斷崖

有個叫 Iyung Wasaw，原居地是 Truku 部落，約十幾歲時入贅遷入 Ruku daya 部落，在移居地建立家室和繁衍後代。有天，他奉命騎著白馬送信到霧社，返回駐在所覆命時，在一段陡線斷崖，為了想向對岸的親人炫耀，大吼一聲，白馬受到驚嚇，跌落到深谷。

回去後，日人長官偷偷說：「不要據實以報，就說白馬不幸跌落溪谷就好。」然後，部落的人跟著 Iyung Wasaw 下到溪谷尋找那隻馬，白馬早已死亡，隨即用木頭綁住抬回部落分享。